

Societad da musica Mustér e „Tür auf – mo vinavon“ retscheivan il Premi Desertina

La vischnaunca da Mustér ha undrau il venderdis sera la societad da musica e l'organisaziun „Tür auf – mo vinavon“ cul Premi Desertina. La musica retscheiva il premi da renconuschientscha per sia gronda ed excellenta activitad culturala sur biebeen 125 onns. Il premi da promoziun vegn surdaus a „Tür auf – mo vinavon“ per siu engaschi sin differentes secturs enteifer la vischnaunca e la regiun.

La cumissiuin dil Premi Desertina che consista da *Roger Tuor* (president), *Hans Huonder*, *Marcus Huonder*, *Sonja Coray Capaul* e *Martina Sialm* ha fatg uonn per la secunda ga la tscharna dils retscheviders dil Premi Desertina. Igl onn vargau ha ella distinguiu en num dalla vischnaunca pader *Ambros Widmer* ed il sportist *Sergio Berger*. Uonn ei la cumissiuin sedecidida per duas instituziuns e quei cun buns motivs. La surdada dils premis ei succedida entras il president communal *Aldo Tuor*. La fiasta ei vegnida embellida da pliras producziuns dalla societad da musica e dil Chor da dunnas Cantalegra, dirigius da *Jacinta Jacomet*.

Honor alla musica

Che la Societad da musica Mustér ei vegnida tscharnida pil premi da renconuschientscha, ha bunas raschuns e plirs motivs pesonts. Quels ein vegni presentai il venderdis sera dil mistral cass *Heinrich Huonder* en ina extendida e detagliada laudatio. En quella ha el constatau, che la societad ha saviu festivar avon dus onns il giubileum da 125 onns. Da principi exista ella denton gia dapi igl onn 1844. Lu eis ella vegnida fundada sco „Societad de Blechmusica dalla vischnaunca de Mustér“. La musica ha giu excellents temps e deplorablamein era fasas ordvart difficilas. Avon rodund 35 onns eis ella stada en in stan fetg critic. Sin iniziativa dil dirigent da lu, *Meinrad Giger*, ha ella puspei cattau la via dil success. Igl onn 1976 eis ella returnada cun bialas arbagias dalla Fiasta federala da musica a Bienna. Dapresent vegn la musica dirigida dil musicist indigen *Richard Gadola* e presidiada da *Theres Burri*. Dapi igl onn 1974 fuorma la gruppa dils tamburs ina part integrala dalla societad da musica. Iniziant da quella ei igl inspectur da scola *Linus Maissen* staus. Oz vegn quella gruppa – che ha saviu nudar grondius success sin plaun cantunal e naziunal – dirigida da *Christian Berther*. La musica dumbra dapresent 36 commembras e commembers, la gruppa dils tamburs 19. „La societad da musica ei aschidadir nossa carta da viseta, l'enzenna da nies vitg. Sia representaziun a caschun d'occasiun festivas, a beinvegnis, tier processions e tils ei per vischnaunca e pleiv d'impurtonza eminentamein impurtonta e dumandada. Ella – la societad da musica – duei gidar a proteger la tradiziun culturala e medemamein esser aviarta per novas tendenzas che promovon il svilup.“ La presidenta *Theres Burri* ha engraziu alla vischnaunca per la honor. Il premi seigi ina biala remuneraziun per biaras e biars che seigien s'engaschai a favur dalla societad da musica.

Vasta activitad

Il secund Premi Desertina da renconuschientscha ei vegnius surdaus alla fundaziun „Tür auf – mo vinavon“. Ella ei vegnida fundada avon rodund 15 onns da persunas dad omisduas confessiuns cun la finamira da crear pusseivladads da sentupada ella Cadi. „La finamira principala ei stada quella da coordinar ed organisar eveniments sil sector socio-cultural, iniziar dialogs denter giuven e vegl, denter indigens e jasters, catolics e reformai e d'autras confessiuns“, di *Maria Keller* che ha tenu la laudatio. Dapi l'entschatta ei ser *Roland Just* president dalla fundaziun. Aschia ha quella iniziou en quels 15 onns la lavur sil sector dalla

giuventetgna (SIGA) e las seras da film cun discussiuns (Arena). Cun ina grupp da pliras persunas ha ella reactivau il kino a Mustér. Biars onns eis ella denton era sestentada per la vendita da products dil Tierz mund el Labirint el center dil vitg da Mustér. Quella stizun ch'ei vegnida menada quater onns da biaras e biars senza indemnizaziun, ha deplorablamein stuiu serrar las portas. "Tgi savess s'imaginar tgei cesura ch'ei fuss sch'ins strihass ils Camps Cadi", sedamonda Maria Keller. Mintg'onn van rodond 60 affons dalla socla primara el camp dils pigns e da quei da 40 el camp dils gronds per in'jamna en cumpignia. L'instituziun ha denton era fundau il Trialog, ina caschun da schar trer flad l'olma e da recuperar las forzas. Sco pli giuvna accziun sustegn ella la Fundaziun Mbara Ozioma en Nigeria. Cun donaziuns da differentas varts vegn luvrau cheu vid il provediment fundamental dils indigens, seigi vid scolas, spitex ni era provediment d'aua. *Augusta Gadola* che ha astgau retscheiver il premi sco representanta dalla fundaziun "Tür auf – mo vinavon", ha engraziu per la honur e sutlingiau igl engaschi endinau da ser Roland Just. Senza lez fussi bia buca realisau ni cuntinuau.